



BERG NUUS

DIE BERGKLUB VAN SUID-AFRIKA
AFDELING TYGERBERG
TYGERBERG SECTION

POSBUS / PO Box 4572
7536 TYGERBERG

Julie 2012

BERG NUUS

Berg-Informasie

Die bergklub het 'n "Facebook" bladsy. Die bladsy het nog nie veel informasie op nie, maar dit sal binnekort allerlei informasie oor die klub en aankomende stappe insluit. Ons kan gevind word op Facebook as "BKSA Tygerberg". Stuur vir ons n "friend request".

BERGSTORIES

PANORAMA ROETE, JONKERSHOEK

21 April 2012

Saterdag, 21 April'12 is ek en my vriendin genooi om saam met die Bergklub in die Jonkershoek berge te gaan stap, of moes ek eerder gehoor het "klim" (kom die vraag na die tyd my by op) toe ons byna 9 ure later weer in ons verskillende voertuie vertrek vanaf die punt waar ons ons permitte gekry het, die sogenaamde "withek".

Vir my sal dit altyd 'n besonderse bekoring wees om tyd in hierdie pragtige vallei te verwy, want dit is waar ek sedert 1967 gewoon het tot 1979, in die "Spookhuis", of nou genoem die "Olyfhuis" – en beskou dit deels as my grootword-plek. Die plek waarvandaan ek Paul Roos toe is, asook later na die US Kampus vir baie jare.

Dit is die vallei wat Simon vd Stel in 1692 aan Jan Andriessen gegee het, ook bekend as Andries Jonkheer, wat die gebied "Vallei Jonkershoek" genoem het weens sy "batchelor" status. Hierdie vallei voed ook die volgende riviere: die Eerste-,

Berg-, Lourens- en Riviersonderend riviere, en dit is 'n wonderlike kosmiese gevoel om jou voete in die oorsprong van 'n rivier te plaas – daar waar dinge begin!

Verder was dit ook 'n warm ervaring om my broer Johann Benkenstein te geniet as ons "guide" - die lid van die Bergklub wat om 07h30 eers al die administrasie by die ingangshek moes afhandel, permitte kry, reel met watter motors ons inry en almal oor die moet's en moenie's moes inlig, asook om ons aan te jaag sodat die stappery kan begin.

Twee voertuie neem ons groep in en ons word by die Swartboskloof se beginpunt afgelaai. 'n Ander voertuig word by die "Witbrug" gelaat, waar ons hopelik almal veilig weer sal terugkeer. My vriendin Karien vd Walt bekommer my, want haar suster se baba word verwag en ons is nog nie halfpad met die 4.5km se opgaan in die kloof nie, toe 'n ongehoorde geluid my aandag aftrek van die suikerbekkies se roepgeluid – 'n selfoon kondig die geboorte van die baba aan... en Karien stap as "Tannie" die roete verder met hernude energie en 'n breë glimlag!



Halfpad op met Swartboskloof word ons eers vertel en gewys waarom die Rooiels-boom ook die Assegaaiboom of die Lepelboom genoem word - deur Frans, die oudste lid van ons geselskap op 80! In die kloof is ook 'n kamera om die beweging van luiperds te monitor.

Senuagtig bestyg ons die laaste deel, want die mis trek toe en sigbaarheid raak baie min. Bo gekom moes ons fyn 'n kaart bestudeer - gelukkig het ons die vaardighede van Dr. Barbara van Geems om saam te bepaal wes of oos verder!

Omdat ek die roete ongeveer 30 jaar gelede as skoolseun gestap het, wou ek knaend vra "hoe ver nog"? Gelukkig is die plato met sy uitsig pragtig, grasgroen en redelik gelyk, maar die "Kurktrekkers Nek" kon ook nie veel later aangebreek het vir 'n welverdiende blaaskans en lekker middagete nie.



Die stap oor Dwarsberg is baie lekker, maar mens moet op jou hoede wees vir los klippe en fokus behou vir die daling na "Bergrivier Nek" waar die Bergrivier sy oorsprong het. Die allermooiste uitsig word geniet met "teetyd" en die laaste lekkergoed, alvorens ons sig-sag daal na die "witbrug". Hierdie gedeelte was maar swaar op die kniee van sommige van ons en die aand se "Panamor" moes maar help met die na-pyne!

Dankie aan Johann wat ons volgens skedule weer 5nm veilig by die motors gekry het - en die geselse en grappies wat gedeel is met die roete en tydens die "Castle" by die withek, wat die swaarkry dadelik iets van die verlede gemaak het, sodat slegs die lekker oorbly!

- Raymond Benkenstein



"Karoo to Coast" – 'n ander ene (Freda se Fietstoer 27 April – 1 Mei 2012)

Ek was al op 'n paar, en die een is lekkerder as die ander. Hierdie toer het ons geneem van Barrydale, oor die berg na Riversdal, dan Stilbaai, Vermaaklikheid en na Malgas (soos die spreekwoordelike waters van rus).

Die eerste aand het ons heerlik gekuier in Gerrit en Annelie se pragtige plaashuis naby Barrydale. Almal het mekaar leer ken en Freda en Charlie het die reëlins verduidelik. Almal het 'n gaatjie gevind in die ruim huis en teen nie te laat was "ligte uit" en almal in droomland.

Die volgende oggend het die puriste van die plaas af begin fiets. Ons ander het per motor tot verby Barrydale gery (en gewaai vir die puriste). Ons fietstoer begin by die Brandrivier afdraai. Die gemaklike grondpad slinger suidwaarts in die rigting van die Langeberge. Na teetyd raak die grondpad 'n kleiner pad; amper 'n jeep track teen die steil hange uit. Die veld verander van karooveld na pragtige nat fynbos. Bo op die berg stop ons vir middagete met pragtige uitsigte. Na ete kronkel die pad af in pragtige klowe en valleie, die bo-lope van die Duiwenhoksrivier. Teen laatmiddag bereik ons Korente -Vetterivier dam, 'n verrassing in die berge noord van Riversdal. Ons slaap in 'n ou skoolgeboutjie op 'n skiereiland in die dam. Die omgewing is eenvoudig prentjiemooi. Ons kuier tot laataand in die boma en rus lekker uit vir dag 3.

Sommiges verkies weer om van die slaapplek af te fiets, maar die meerderheid (ek ook) ry per

voertuig tot net suid van Riversdal. Ons fiets deur velde van dekriet in 'n suidelike rigting. Die pad draai effens suid-oos en ons volg die Goukourivier na Stilbaai. Veral die laaste deel langs die rivier is pragtig: klein huisies en prentjie –plasies wat afkyk op die rivier. Die pad is bedrieglik moeilik met talle kronkels en bulte wat elke keer jou spoed breek.

Ons slaap die aand in Stilbaai se munisipale kampeerterrein en eet heerlik uit by 'n restaurant. Dis lekker om 'n slag aan 'n tafel te sit en bedien te word “Slap chips” bly altyd n wenner! (en moenie die wyne vergeet nie).

Die laaste dag neem ons wes na die plaas Koenserust (naby Vermaaklikheid) via Jongensfontein. Die teerpad na Jongensfontein ry maklik en lekker. Die omgewing is mooi en platterig. Aanvanklik ry ons naby die see, later is hy net sigbaar in die blou verte. Teen laatmiddag bereik ons Koenserust. Dis 'n pragtige plasie naby die see. Daar is 'n oulike gastehuisie op die plaaswerf waar ons tuisgaan. 'n Klompie van ons gaan kyk (met voertuie) na die gastehuisie in 'n smal strokie teen die rotskus, so 2km suid van die plaashuis.

Ons kuier weer heerlik die aand. Almal (die meeste!) stort lekker warm en ons rus lekker uit vir die laaste skof na Malgas.

Die volgende oggend is ons vroeg uit die vere vir die lang dag. Almal begin fiets direk van die plaas. Ons ry later oor die dorpie Vermaaklikheid, 'n pragtige klein plekkie. Freda wys vir ons waar haar pa kerk gehou het. Sy gesels met van die inwoners wat nog haar familie onthou! Die dorpie bestaan uit net 'n paar huisies, 'n poskantoor en winkel.

Die dag word lank en uitputtend. Die laaste klompie kilometer fiets ons teen sterk wind (gelukkig die eerste nare wind op die toer). My GPS troos darem dat Malgas nader kom. Skielik begin daal die pad af na die groot (Breede) rivier. 'n Mens sien die pont van ver af. Dis 'n oulike ding. Drie manne trek die pont (met tot drie voertuie) met mannekrag oor die Breërivier. 'n

Mens wag maar jou beurt af; fietse is gelukkig klein en pas maklik in, ons kom gou oor.

Die ander kant van die rivier is soos “die beloofde land” Ons trek gulsig in die Malgas Hotel in en drink iets vir die diepe dors by die kroeg.

Die aand smul ons heerlik aan die driegang hotel-ete, maar verbasend genoeg is almal vroeg in die kamers en ligte is uit! (seker die wind en laaste bulte).

Die laaste oggend kuier ons vir oulaas saam oor heerlike ontbyt in die eetkamer wat uitkyk oor die rivier. Dis tyd vir fietse oppak en die pad huis toe vat. Op pad uit stop ons by die Malgas winkel wat jou terugvoer na plaaswinkels van dekades gelede.

Soos altyd is Freda se Fietstoer een groot lekkerte! Dankie dat jy die geleentheid vir ons moontlik gemaak het.

-Altus de Wet

Wolfbergskeure – Sederberge

17 – 19 Mei 2012

Nege stuks het Vrydagmiddag in drie voertuie vertrek na Sanddrif waar ons die naweek gekamp het. Aanvanklik sou Estelle Zietsman saam met Hugo Kritzingen 'n geleentheid gekry het, maar met haar aankoms by Hugo se adres het sy die besigheid net so een kyk gegee en besluit daar is te veel bagasie vir sy motor en het sy omgedraai en haar Prado gaan haal.

Gelukkig het almal veilig die aand by Sanddrif arriveer en het ons lekker gebrui. 'n BAIE MAK Muskelfaats het ons die aand kom verras en was maar te bly vir al die “krummels” op die grond. Ons kon pragtige foto's van hom neem. Ek dink wat ons almal sal onthou van dié naweek is hoe koud dit was. Toe ons Saterdagoggend half verluim uit ons tente kruip, was Estelle se woorde: “Nou weet ek wat 'n -8 grade slaapsak beteken. Jy sal nie vrek van die koue nie, maar warm gaan jy ook nie kry nie!”

Almal was Saterdagoggend maar 'n bietjie stadig om gereed te maak vir die Wolfbergskeure klim tot by die Boog, want dit was net te koud. Ek en

Charlie het die permitte by die kantoor gaan haal en ons moes maar so voel-voel ry, want die voorruit was ge-ys. Soos wat ons die water op die voorruit gespuut het, het dit dadelik gevries!

So teen 9.15vm het die tog teen die berg uit begin. Helen en George McDonald, ons gaste, was 'n bietjie bekommerd dat hulle nie by sou hou nie, maar dit het heel goed gegaan. Almal het vir almal gehelp deur die skeure en ek moet sê ek het vir Helen op 'n stadium baie jammer gekry, want sy was regtig baie bang vir die donker en nou gangetjies.

Bo uitgekom, het ons die stukke ingesit na die Boog toe. Ons het by die Boog middagete geniet en toe die terugtog aangedurf om betyds onder die berg te wees voordat dit donker word.

Nadat elkeen 'n lekker warm stort geniet het, het ons almal vergader rondom 'n lekker warm vuur, want weer het die koue ons bekruipt.

Sondagoggend het almal maar traag opgestaan. Ek dink daar was 'n paar met 'n kopseer ook! Na ontbyt het ons met die motors vertrek na die Maltesekruis, maar glo my dit het nie so voorspoedig begin nie. Estelle se Prado was so dood soos 'n mossie! Gelukkig vir die manne het hulle iets reg gedoen en het die motor gevat en kon ons vetrek na die Maltesekruis toe. Diegene met die kopsere het 'n bietjie gesukkel aanvanklik, maar hulle het gou die gif uitgesweet!! Die Maltesekruis bly vir my seker een van die mooiste wonders. 'n Mens word beloon met die pragtige prentjie soos wat jy die klofie uitstap.

Terug by die kamp het ons tente afgeslaan en elkeen het op sy eie tyd vertrek. Die McDonaldse het sowaar 'n luiperd oor die pad sien loop in Uitkykpas. Ek wonder of hulle besef hoe gelukkig hulle was. Ons stap al jare in die berge en sien hoogstens net hul voetspore!

Ek dink almal het die naweek baie geniet, want hierdie deel van die Sederberge is baie spesiaal.

- Freda Buckle

Komende stappe

Maskamberggrot – 9 tot 12 Augustus 2012

Ons beplan weer 'n lekker naweek in die Gifbergarea op die plaas van mnr. Dave Schlebusch. Die stap is veral geskik vir gesinne en diegene wat nie meer so erg fiks is nie. Dit is ongeveer vier uur se ry vanaf Kaapstad en dus stel ek voor dat ons vroeg die oggend van die 9de vertrek sodat ons nog die res van die dag kan geniet.

Ons gaan in die chalets tuis, aangesien die kamplek ongelukkig reeds beset is. Dit is egter baie billik teen so R100 per kop per nag.

Daar is verskeie stapgeleentheid op die plaas en ons hoop dat daar dan ook al mooi blomme sal wees.

Daar is ongelukkig net plek vir 12 persone en daarom is dit belangrik dat jul so gou as moontlik bespreek. Ons moet ook 'n deposito betaal en daarom vra ek dat diegene wat bespreek ook asb. 'n deposito van R150 vir die naweek betaal.

Bespreek asb. by Erna teen 26 Julie.

Kontakbesonderhede: Tel: 021-9193736 of selnr. 0835984146 en e-pos: ernakrit@gmail.com

